



ՄԱՅՐ ԱԹՈՒՈՒՄ

Հուլիսի 4-ին, հինգշաբթի, «Տօն սրբոց թարգմանչացն մերոց Սահակայ և Մեսրոպ-րայ»: Օրվա մեծ տոնի կապակցությամբ, Օշականի Ս. Մեսրոպ Մաշտոցի անվան եկեղեցում սուրբ պատարագ մատուցեց հոգեշնորհ Տ. Մեսրոպ վարդապետ Պալյանը և քարոզեց «Անճառելի շնորհօք լցեալք ի յիշատակի սուրբ վարդապետին» բնաբանով:

Սուրբ պատարագին ներկա էին Մայր Աթոռի միաբանությունը, Հոգևոր Ճեմարանի ուսանողությունը և հավատացյալների մի սովոր բաղմություն:

* *

Հուլիսի 5-ին, ուրբաթ, Բաբու մեկնեց Մայր Տաճարի ավագ լուսարար հոգեշնորհ Տ. Մեսրոպ վարդապետ Պալյանը, որը կիրակի, հուլիսի 7-ին, սուրբ պատարագ մատուցեց և քարոզեց Բաբվի հայոց Ս. Գրիգոր Լուսավորիչ առաջնորդանիստ եկեղեցում:

Տ. Մեսրոպ վարդապետը հուլիսի 9-ին վերադարձավ Մայր Աթոռ:

* *

Հուլիսի 7-ին, կիրակի, Մայր Տաճարում պատարագեց և քարոզեց Ամերիկայից ուխտավորաբար Մայր Աթոռ ժամանած արժանապատիվ Տ. Վարդան քահանա Մկրյանը «Այնպէս, ասեմ ձեզ, ուրախութիւն եղիցի առաջի հրեշտակաց Աստուծոյ ի վերայ միոյ մեղաւորի որ ապաշխարիցէ» բնաբանով (Ղուկ. ԺԵ 10):

Սուրբ պատարագին ներկա էր Վեհափառ Հայրապետը:

Սուրբ պատարագին ներկա էր նաև ամերիկահայ ուխտավորների խումբը:

* *

Հուլիսի 13-ին, շաբաթ, Մոսկվայի և Համայն Ռուսիո Նորին Սրբութիւն Ալեքսի Պատրիարքի եպիսկոպոսութեան 50-ամյակի հոբելյանական հանդիսությանը հանուն Ամենայն Հայոց Վեհափառ Հայրապետի մասնակցելու համար, Մոսկվա մեկնեց Գերագույն Հոգևոր Խորհրդի ատենապետ և Մայր Տաճարի լուսարարապետ գերաշնորհ Տ. Սահակ արքեպիսկոպոս Տեր-Հովհաննիսյանը:

Սրբազան հորն ուղեկցում էր հոգեշնորհ Տ. Նարեկ արեղա Շաքարյանը:

* *

Հուլիսի 22-ին, երկուշաբթի, «Յիշատակ մեռելոց»: Մայր Տաճարում սուրբ պատարագ մատուցեց արժանապատիվ Տ. Հակոբ քահանա Հակոբյանը: Հավարտ սուրբ պատարագի տեղի ունեցավ հոգեհանգստյան պաշտոն «Վասն համօրէն ննջեցելոց»:

* *

Հուլիսի 24-ին, չորեքշաբթի, առավոսյան ժամը 10-ին, Վեհափառ Հայրապետը մեկնեց Զեխոստվակիայի Կարլովի-Վարիի առողջարանը՝ հանգստանալու համար:

Վեհափառ Հայրապետին ընկերանում էր հոգեշնորհ Տ. Գրիգոր վարդապետ Նղիայանը: Երևանի օդանավակայանում Վեհափառ Հայրապետին ճանապարհեցին Մայր Աթոռի միաբանները:

Նորին Ս. Օծության ճանապարհեց նաև Հայկական ՍՍՌ Մինիստրների սովետին առնթիւ Հայ Եկեղեցու գործերի խորհրդի նախագահի տեղակալ պր. Ս. Հովհաննիսյանը:

* *

Հուլիսի 26-ին, ուրբաթ, Լենինական և ապա Թբիլիսի մեկնեց հոգեշնորհ Տ. Մեսրոպ վարդապետ Պալյանը՝ պատարագելու և քարոզելու համար: Հոգեշնորհ հայր սուրբը հուլիսի 28-ին, կիրակի, Լենինականի Ս. Աստվածածին եկեղեցում պատարագեց և քարոզեց «Որք արժանի եղէք տեսանել մարմնով զՈրդին Աստուծոյ յայտնապէս» բնաբանով: Իսկ օգոստոսի 4-ին հայր սուրբը պատարագեց և քարոզեց Թբիլիսիի Ս. Գևորգ առաջնորդանիստ եկեղեցում:

Մեսրոպ վարդապետը Մայր Աթոռ վերադարձավ օգոստոսի 8-ին:

* *

Հուլիսի 28-ին, կիրակի, Մայր Տաճարում պատարագեց արժանապատիվ Տ. Հովհաննես քահանա Մարությանը: